

Meeqqanut ilaqutariinnullu siunnersuisoqatigiinnik kingusinnerpaamik 2010-mi pilersitseqqullugit Naalakkersuisut peqquneqarnissaannik inatsisartut aalajangiiffigissaatut siunnersuut.
(Siumup inatsisartuni gruppia)

Akissuteqaat

(Isumaginninnermut Naalakkersuisoq)

Siullermeerneqarnera.

Siumut qutsateqarfiginiarpara pineqartoq sammimmagu, Naalakkersuisunit annertuumik pingaartinneqartoq: Tassalu uagut inuiaqatigiittut meerartatsinnut, inuusuttatsinnut taakkualu ilaqutaannut atuagassiissutigisartakkavut qanoq iliorluta pitsanngorsaaviginnaavagut.

Naalakkersuisut tapersersuisuulluarput, siunnersuisoqatigiiffimmik pilersitsisoqarnissaanik, meeqqat inuusuttullu soqutigisaannik aamma anguniagaannik isumaginnittarsinnaasumik, Naalakkersuisunit siunnersuisarsinnaasumik kiisalu Namminersorlutik Oqartussat aamma meeqqat inuusuttullu tungaasigut innuttaasut akornanni atassuteqaatitut atuussinnaasumik. Naatsumik oqaatigalugu: pineqartumi sammimminermik ilisimasaqarnermillu pilersitsissussamik.

Meeqqanut ombudsmandeqarfimmik pilersitsisoqarnissaanik Demokratit taamatutaaq kissaateqarsimapput, aamma ATASSUT oqaaseqarpoq, partiip toqqissisimanartikkaa iluarisimaaralu meeqqat inuusuttullu pillugit samminnineq annertummat, imatullu isikkoqalerpoq Inatsisartuni tunngaviusumik isumaqatigiittoqartoqartoq, meeqqat inuusuttut aamma ilaqutareeqarnerup tungaasigut siunnersuisoqatigiiffimmik nakkutiginnittussamik tassungaluunniit assingusumik pilersitsisoqarnissaa.

Taamaattumik Naalakkersuisunit misissorneqarniarpoq, siunnersuisoqatigiiffik taamaattoq pilersinneqannginnermini qanoq isikkoqartariaqarnerpoq. Taamaalilluni qulaajarneqassapput, suliassat sorlerpiaat siunnersuisoqatigiiffimmit isumagineqassanersut, siunnersuisoqatigiiffimmi kikkut sinniisuussanersut, qanorlu iliorluni taakku toqqarneqartassanersut, siunnersuisoqatigiit siunnersuisartuullutik siunnersuisoqatigiussanersut imaluunniit naammagittaalliornermi siunnersuisoqatigiussanersut il.il.

MIPI-mimi meeqqat inuusuttullu atugaasigut malinnaasoqareeremat, tassanga paasissutissanik katersisoqartarpoq, oqallinnernik pilersitsisoqartarpoq kiisalu meeqqat inuusuttullu atugarisaat pillugit ukiumoortumik nalunaarusiortoqartarluni. Taamaattumik pingaartuuvoq, tassunga atatillugu MIPI-p eqqarsaatigineqarnissaa, taamaalilluni nunatta karsianit isumalluutit pioreersumik pilersitseqqinnissamat atorneqassanngillat.

Ilaatigut apeqqut qulaani taaneqartoq qulaajarniarlugu nalunaarusiornermik aallartitsissaanga, tunngaviliisussamik aalajangersimasumik siunnersuuteqartussamik siunnersuisoqatigiit ilusissaannut, tassanilu MIPI ilanngullugu eqqarsaatigineqarsimassalluni. Nalunaarusiaq taanna 2010-mi piarersimassaaq. Pineqartup sukumiisumik qulaajaavigineqarsimanissaanik aalajangersimasumik suliniummik aallartitsisoqannginnerani kissaateqarninnut pissutaavoq,

siunertarineqarmat sulinerup tamatuma Naalakkersuisut meeqqat inuusuttullu tungaatigut tamakkiisumik periusissaannut ilusilersorneqalersumut ilaatinneqarnissaa.

Siunertamut tassunga paasissutissiilluni atuakkamit innersuussutit ilaatinneqassapput, taakkuupput meeqqat inuusuttullu tungaasigut ataqatigiisumik ataqatigiissaakkamillu suliniuteqartoqarnissaanik aqutsisoqatigiinnit uannut 1. oktober tunniunneqartut. Naalakkersuisuusimasunit aqutsisoqatigiit taakku pilersinneqaqqaarsimapput. Aqutsisoqatigiinni kiisalu taassuma ataani suleqatigiissitani arfineq-marluusuni kattuffinnit ilisimasallit piumassutsiminnillu sulisut kiisalu pineqartumi inuit ilisimasallit sinniisuusimapput. Tamakku saniatigut pilersaarutigineqarpoq ataatsimeersuortoqarnissaa 2010 aallartisimalerpat ingerlanneqartussamik, taanna toqqammaviliisuussaaq qaninnerusumik suleqatigiittoqarnissaanik ilisimasanillu avitseqatigiittoqartarnissaanik Isumaginninnikkut Naalakkersuisoqarfiup kiisalu ilinniakkatigut piumassutsiminnillu sulisut kattuffiisa akornanni.

Taamaattumik qulaani allassimasut tunngavigalugit Naalakkersuisunit inassutigineqarpoq, siunnersuut taamatut isikkoqarluni taperserneqassanngitsoq.